



16 marts 2009

Inatsisartut Suleriaasianni § 36, imm. 1 naapertorlugu Naalakkersuisunut apeqqut imaattoq matumunna saqqummiuppara:

1. Sulisitsisut akileraarutitigut akiitsui 300 mio. koruuninik sinneqartut qanoq qaammatikkaartumik agguarneqarsimappat, januar 2007-mi akileraarutitik akiliisitsisarnerup qitiusumit ingerlanneqalernerata kingorna?
2. Sulisitsisut akileraarutitigut akiitsui 300 mio. koruuninik sinneqartut qanoq suliffeqarfikkuutaamik agguarneqarsimappat, januar 2007-mi akileraarutitik akiliisitsisarnerup qitiusumit ingerlanneqalernerata kingorna? Uani aamma aktieselskabit Namminersornerullutik Oqartussanik pigineqartut.
3. Qanoq isillutik Naalakkersuisut sulisitsisut akileraarutitigut akiitsui 300 mio. koruuninik sinneqartut akilertinniarsariniarpaat? Uani qanoq akiliisitsiniarnermi iliuuseqassamaarneq piffissarititaasorlu pineqarpoq.
4. Sulisitsisut akileraarutitigut akiitsui 300 mio. koruuninik sinneqartut akilertinniassagaanni qanoq Naalakkersuisut iliorniarpat - nunarsuarmi aningaasaqarnikkut ajulusoorneq qiviassagaanni - suliffeqarfiit matooralissagaluarpata?
5. Ilimanarsinnaava nunarsuarmi nunat tamat akornanni aningaasatigut ajulusoorneq taamanili aallartikkamili Kalaallit Nunaanni aamma piusimasoq malugineqanngittoorsimasoq? Ilami piffissaq sivikittoq atorlugu sulisitsisut akileraarutitigut akiitsui 300 mio. koruuninik sinneqalersimapput.
6. Danmark-mi aaliagiunneqaqqammerpoq suliffeqarfiit sulisut akileraarutaat momsimullu akiliutissat qaammatinik pingasunik kinguartitsisoqarsinnaasut ilaatigut pissutigineqarluni inuussutissarsiornerup iluani aningaasassaaleqineq. Naalakkersuisut assigisaanik maani pilersaarusiussamaarnerlutik?

Tungavilersuut

Qularutissaanngilaq nunarsuarmioqatigiit akornanni aningaasatigut ajulusoornerup kinguneringaa, januar 2007-mi akileraarutitik akiliisitsisarnerup qitiusumit ingerlanneqalernerata kingorna sulisitsisut akileraarutitigut akiitsui amerleriapiloorsimasut.

Soorunalimi ingerlaannarsinnaanngilaq sulisitsisut akileraarutitigut akiitsui landskarsi ajortumik eqqorunikku. Taamatulli oqareerluta Kalaallit Nunaanni inuiaqatigiit assakaasui ingerlatinnissai pisariaqartippagut nunarsuarmioqatigiit aningaasatigut ajulusoornerat ajoquteqarpallaarnata qaagissagutsigut. Nunarsuaq tamakkerlugu Naalakkersuisuutitat annaassiniarlutik poortukkat assigiinngittut aaliagiissutigisaqattaarpaat ilaatigullu sanaartornernut assigiinngittunut aningaasaliisaqattaarlutik. Pisortat aningaasaliinermikkut sanaartortitsinerani suliffiit attatiinnarneqassapput inuiaqatigiit akornanni inooriaaseq appannginniassammat.

Maani nunatsinni Naalakkersuisut inatsisartut aningaasatigut inatsisissaat ajulusuunnginnissaa anguniarlugu inissialiortitsinissamut aningaasartuutit annertuut sipaarutigisimavaat. Aningaasatigut ajulusoornerup sunniipilunna nunatsinnut ajornerpaajuguni sinnattupilunngorsinnaavoq suliffeqarfiutigut matooralissagaluarpata. Tamanna suna tamaat atorlugu pinngittoortinniartariaqarparput.

Ullut qulit qaangiutsinnagit apeqqutit tamarmik nammaginantumik akisimaneqarnissaat ilimagissavara.

Marie Fleischer

Inuit Ataqtigiit sinnerlugit Inatsisartunut ilaasortaq